

GUILTS NE PXEEL PABL LO ZHA ROMA

¡Diuzh to grëse to!

¹ Naa nac Pabl, naa nac tib ngundziin win quiayun naa xtsiin Jesús. Dios bredz naa pxeel me naa none naa Xtiidz Ndzon me lo miech.

² Padzeelale bnee Dios ne laa me cxeel Diidz Ndzon rii lo ne, lëew ga bzeet grë zha ne biaad padzeela biadteed xtiidz me lo miech, lëew ga raquiet lo guits ne zhobnee Xtiidz me. ³ Lëew ga rnee ganle cho nac Jesús (men ne brieequia lo xtii rey David ne laa me goc miech lo guidzliu; ⁴ sangue Espíritu Sant, pxobnen me ganle Xpëed Dios nac me; min co gane brieegan me).

⁵ Zeene biaad Jesús, ga pxobnen me ganle tibaque noxco Dios ne; ni niina Diosaque bzooblo naa rxeel me naa none naa Xtiidz me lo grëse miech, zeena gliladz zho me, gon zho diidz gban zho zigne rnabey me. ⁶ Zig nac to, glo lo guielcow ga ngab to; sangue niina laa me bredz to laa to ngab xnëz Jesús.

⁷ Laa naa rxel guits rii lo to, grëse to ne no to guiedz Roma i. Golgacnan ganle rleynie Dios to, gane laa me bredz to ygab to lo me, gban to zigne no gban zha ne ngab lo me. Me ne nac me Pxoze ne, ni Jesús men ne rnabey, tibaque noxco me to, me nac men ne gacnien to zeena peet zhgab ctsebde to.

⁸⁻⁹ Nanle to nasca ganle xtsiin Dios quiayun naa, dib zdoo naa quiaseed naa miech Diidz Ndzon ne nac zhiwseed Xpëed me.

Nu ne laa naa rsilo rne lo to, gloque rded naa xquizh lo Dios ni lo Jesús por mine quiayun to grëse to, sac gon

teḷ pa lotaa zëeb diidz ne nḷipaa dib zdoo to rḷiladz to me. Me zobwi, me naḅ gaḅle zeene rḷabtaa naa lo me, ib rīaanladzd naa to, tībaque rḷab naa lo me gacniē me to; ¹⁰ ni tībaque rḷab naa teḷne zneedz me diidz gḷziḅ tib dze ne grieeḷo guaḷ naa i guaḷgaḅ naa to. ¹¹ Ne nḷipaa rquiabladz naa gaḅlo naa to, guaḷzhaal naa gnedz naa rson lo to guiē to zha ycaaniaraa to guaḷbiini ne rneedz Espīritu Sant; zeēna tīblique gac guic to dziitsraa so to. ¹² Ni scagaa tīpse gac ne zīdiidz ne zha nac Xtiidz Ndzon Dios, miḅne rḷiladz ne; zeēna tīpse gac ne sodziits ne low.

¹³ Bets, bzian, teḷ gaḅ to gaḅle blactaa vuelt ziyacladz naa guaḷ naa i guaḷgaḅ naa to, per haxta lo nadze goḅ rrieeḷodaque guaḷ naa. Ib laa guic naa no guaḷ naa lo to i, zeēna gacndalraa miech ne sēeb gliladz Xtiidz Dios, zigne ziyacndal zho grēraa zaatne ziyateed naa. ¹⁴ Sac ible naa raguāḷ cseed miech Xtiidz Dios, grēse zho niicle zha nona, niicle zha mbana; niicle zha raca, ni niicle grēgaa zha ne peet riēnda. ¹⁵ Miḅcocxe waa, tībaque laa naa racladz ye nēz qui guaḷ naa guaḷne naa Xtiidz Ndzon Dios lo to, ne nac to zha ne no guiedz Roma i.

Poder ne rap Xtiidz Ndzon Dios

¹⁶ Teḷ naa, ib rḷoladzd naa gne naa Diidz Ndzon rii lo miech, sac ncuāḅ ro ne ruḅ Dios zeene rquiāadiag miecha. ¡Grēse miech ne gliladza, ib zlaa zho lo xtoḷ zho! Laa guaḷnzaac co no niina par grēse miech. Glose lo zha Israel bdziḅna, laa niina laaw quiadziḅ lo grēraa miech, zeēna grēse zho gḷig sēeb xnēz Dios. ¹⁷ Sac goḅ, lēē Diidz Ndzon rii rḷu zha rbiire rcaania Dios miech, rsaḅmbe me zho lo doḷ rbiire rīaanwen zho lo me: totsaque nḷi dib zdoo zho gliladz zho miḅne nac Xtiidz me. Sca zhobnee lo Xtiidz me, zaatne rnee: “Zha ne bīaanwenle lo Dios, ib zrieeḷo

gbannie zho me, sacne dib zdoo zho rliladz zho miñe nac Xtiidz me.”

Xtol miech

¹⁸ Ndionle ne ganle no guielñe ro ne csiaab Dios yгаа grëse miech ntseeb, miech ne nëd gac-wen, ni desde gbaa cxeel me guielñe ne yгаа zho; sac por xquielntseeb zho rsaand zho gacnan grëraa miech miñe nac diidzli.

¹⁹ Grë zha ntseeb, nanle zho zha nac Dios, sac mezhhal blu lo miech zha grieelo gunbey zho me. ²⁰ Niicle ne grieelod ganlo ne Dios, per de lo grëtaa ncuaane bzaa me, grëtaa ncuaane run me, gase rlu ganle cho nac me. ¡Gase rlu ne nli me nac Dios, ni gdzind dze ne lozh xpoder me!

Gacxe waa grë zha ntseeb, ib tedlaad zho lo guielñe ne csiaab me ga; ²¹ sac gon niicle nanpaa zho me nac Dios, ni ib rond zho xtiidz me. Nëd zho gunbey zho me zigne rieguala, niicle xquizh nand zho gdeed zho lo me. Laa ne rzac zho na rien zho pe run zho, lel pcow xquielrien zho; rzac zho na lëew ga, gun zho ncuaane guiaabtaa guic zho. ²² Niicle ne rzac zho zharien zharac nac zho, per zha nac miech ne quialoozhraa lo xquielnxen; ²³ sac gon laa ne gunbey zho guielndzon ne rap men ne nacpaa Dios nguiamban, lel rsilo zho rzaa zho grë mdio ne niaa zigne rlu samiech guidzliu zho, grë mdio ne niaa zigne rlu grë ma ne rsiibe, grë ma ne rzë tap ni, grë ma ne rzëlen lo liu; lel grë ncuaan co ziegan zho laa ne gleynie zho men ne nacpaa Dios.

²⁴ Mincocxe nagon waa, rsaanladz Dios zho laa zho zienal grë ncuaane ndzinlid ne rzoobladztaa zho. Grë ncuaane ntoladzdox ne run zho, lëëque zha runnguzee zho rguitnie zho xcuerp zho. ²⁵ Sac laa ne gleynie zho diidzli miñe rnabey Dios, lel miñe rnee zha ne rquidie rleynie zho; lel grë ncuaane bzaale Dios, ncuaane psanle me, ncuaan co ziegan zho, lo grë ncuaan co ziequitsgzhib

zho; laa ne yquitsgzhīb zho, gleynie zho men ne nac Dios mban, men ndzon ne psan grētaa ncuaane no. ;Diosse riegual gunnon miech, men co riegual tibaque goolnie zho! Sca rieguala.

²⁶ Ne sca nagon nac zho, gane psaan Dios zho laa zho run grē guielyozh, ncuaane ngubeeguieto ne riegualdraa gun miech. Grē wnaa laa ne gdeed zho diidz gnee tsieel zho lo zho, lel lēēque sawnaa zho rquiangob zho, laa zho zienal grēraa guielyozh; ²⁷ grēgaa mgui, laa ne gnee zho lo wnaa ne nac tsieel zho zigne biaan no gaca, lel lēēque sabgui zho rzoobladz zho. Ncuaane mbixladz run zho, rquiangob zho lēēque sabgui zho; ni ne sca run zho grē ncuaan co, lēē minē rdziniaa zho nac grē guielguidz yozh ne riaan lad zho; ndzinlidraa rac zho.

²⁸ Scataale nac zho, ni bii rzoliaadz zho gbig zho lo Dios, gane niicle megaa rlozh rsaanladz me zho, laa zho biaan lo grē zhgab yozh ne no guic zho, no zdoo zho, min co ne scataa nac zho. ²⁹ Nroobdoo nac xtol zho, sac:

rsacsixuu zho samiech zho,
 rzoobladz zho ncuaane quianied zho,
 racntseeb zho lo samiech zho,
 nē rac zdoo zho ran zho stib noded samiech zho,
 rut zho samiech zho,
 rtsidil zho samiech zho,
 rquidie zho samiech zho,
 rquiadiidzguizh zho samiech zho,
 miech yozh nac zho,
³⁰ rneenē zho samiech zho,
 rquiabro zho lo samiech zho,
 racniats zho lo samiech zho,
 rlu zho ncuaane rapd zho, ncuaane nacd zho;
 rlēēnie zho Dios,
 rio zho rbeebey zho grē guielntseeb,
 rond zho xtiidz pxoz zho,

rond zho xtiidz xniaa zho,
³¹ racladzd zho gon zho diidz,
 rund zho mine rnee zho,
 rleynied zho samiech zho,
 rund zho samiech zho perdon,
 rquiad zdoo zho samiech zho.

³² Niicle ne nanpaa zho zha rnabey Dios none gban miech,
 niicle ne nanpaa zho grëse zha ne run guielntseeb, ib
 tedsod znitlo zho; ni laa zho bii quiayuna, ni haxta rley
 zho ran zho cho grëraa zha ne run grë mine run zho.

2

Xquielwxtis Dios

¹ Ib tedsod no to gnë: “jZha ntseebtaa miech ne sca run!” jPer gni naa lo to ganle, zigtaa zhaw, zigtaa tow, lalga ntseeb to grë to! Sac ye to gon run grë guielntseeb co, gacxe waa, zha ne rzac riegual zha co yгаа zho guielnë ne csiaab Dios, ye zho riegual min co. ² Ndion ne ganle Diossi zeene laa me gun guielwxtis, grëse zha ne sca zianal guielntseeb, ib tedsod zunquizh me zhow.

³ Zha ne sca rlozhd gzee zdoo pe quiayun stib zho, haxta rlisqui zho mine quiayun zha co, ni yeque zho quiayuna; masaque nan zho nagon zdedlaa zho zeene laa Dios guiaadgun xquielwxtis me, masaque nan zho zha cose nitlo, laa zho tedlaa. ⁴ None guien zho ganle pa lotaa nquialadz Dios zho, pa lotaa noyap me zho paciens noxecw me grëtaa ncuaane run zho; sac laa me quiambëz csaan zho xquielntseeb zho, yguudz zdoo zho gban zho zigne rnabey me. ⁵ Telne tibaque squi ndip gac zdoo zho, gond zho mine rnabey me; gacnan zho ganle, quiayunloraa zho grë guielnëdox ne yгаа zho gal dze ne laa me gun guielwxtis. Ni xquielwxtissi me, zigne riegual gaca sca gun mew.

⁶ Gal dze co, laa me gdeed mine rieguial yгаа tib tib miech tel zha wban zho. ⁷ Grëse zha ne güeynal beennon zho lë me, pxobnen zho xquielndzon me, güeynal d zho grë ncuaane rnitlo, lo zha co gdeed me tib guielmban ne gdzind dze lozh. ⁸ Sangue grë zha ne güeynal loxaque grë zhixco zho, güeynal zho grë guielntseeb, laa ne nienal zho mine nac diidzli; zha co yгаа grëse zhian ne csiaab me.

⁹ Ga nagon, grëse zha ne run guielntseeb, zigtaa zha Israela, zigtagaa zha stib guiedza, ible zгаа zho tib guielndox; ¹⁰ sangue grë zha ne rban zaacse, zigtaa zha Israela, zigtagaa zha stib guiedza, ible zгаа zho lo xquielndzon me, zunnon me zho. Ni led yedraa ga pe zhgab ctseb zho.

¹¹⁻¹⁵ Grëse zha ne guntal xtol, tel chotaa nac zho zunquizh Dios zhow; sac tel me, led yed me cue. Zig nac grë zha ne beenbeyd xley me, zunquizh me zho grë xtol zho; sac niicle ne gocnandpaa zho zha naca, per len zdoo zho, guic zho, nanpaa zho pa min nac guielntseeb, pa mingaa nac guielwen. Rriequiacxe waa runbeyle zho xley Dios ga. Scaquegaa zha Israela, ne nac zho zha ne runbeypaa xley Dios, zunquizhaque me zho grë xtol zho; sac niicle ne runbeypaa zho xley me, per tel lozh ga mband zhow. Nanpaa zho pa min wen, ni tel lozh ga rond zho diidz gun zhow; sac gon, led-xe por ne gacnandse ne ley waa laa Dios ycaaniale ne, sinque none gban new.

¹⁶ Zdzin tib dze, zeene laa Dios cxeel Jesús, gunquizh me miech grëse dol ne been zho tib tib zho, niicle mine mazdraa rzac zho ngeets zhlian been zho; sac sca rnabey Dios gaca, ni min co noseed naa miech.

Zha Israel ni xley Moisés

¹⁷ To ne nac to zha Israel, rzac to zienalpaa to xley Moisés, niats rac to, rzac to tose non lo Dios. ¹⁸ Nanwen to zha racladz Dios gban to, nanpaa to pa min wen sac pseed

ROMANOS 2:19 7 ROMANOS 2:29

to xley me. ¹⁹ Min co masaque rzac to to cseed zha ne no lo ncow, grë zha ngoopdol. ²⁰ Masaque rzac to to rienraa zha cseed to grë zha ne peet gacd, to rienraa zha quixbiini to grë zha ne peet riend; sac rzac to ne nan to ley, tose nac zha ne ndziibraa nixbiini, tose nan mine nacpaa diidzli.

²¹ Nana, tel scataa rien to zha cseed to stib miech, ¿pe nac dzigo rwide to mine run to?

Conque to name rnee lo miech cuand zho, ni rlozh ga toque quiaban. ²² Rseed to miech rnee to, tib zha ne nole tsieel, nodne yquiangob zho stib zha ne led tsieeld zho; ni rlozh ga toque noyun min co. Rnee to, rdziguiende to grë mdio, ni rio to rieban to yadoo ne zob grë mdio co.

²³ Rlozhd gacniats to rzac to quiayunnon to lë Dios ne nan to ley, ni nande to gon, lel quiaguitnie to lë me ga, sac mbande to zigne nac ley. ²⁴ Mine noyunpaa to i ga gon raquiet lo Xtiidz Dios, zaatne rnee: “Por xtol to, grë zha zit laa zho rneenë Dios.”

²⁵ Tel to, rzac to porne nacse to zha Israel non to lo Dios, per ne squi mbande to zigne nac xley me, nacaque to zigne nac grë zha zit ne runbeyda. ²⁶ Nana, zha zit ne rioxco rban zigne nac xley me, ¿niacxe rieguald dzigo guiannziuu zho lo Dios? Sannziuu me zho gon. ²⁷ Golgacnan sca ganle, glole zha zit co gon guiannziuu lo Dios, lëdle to ne nanpaa to zha racladz Dios gban to, nanpaa to mine psan Dios diidz ygaa to, ni rbande to zigne rnabey me.

²⁸ Golgacnan sca ganle, led porne nacdse to zhin zha Israel, porne bio to xbey zho, laa to nziuu lo Dios. ²⁹ Led scada gon, sinque zha ne nli dib zdoo rioxco mine rnabey Dios, zha co nziuu lo me. Sac tel Dios, rwidaxe me waa dien cho pe bey ne no, sinque laa me rcaania zha ne nlipaa dib zdoo, dib guic, rban zigne racladz me. Grëse zha ne

znu nac, nziuu zho lo Dios, niicle telne rzac to peet nond zho.

3

¹ Nana, ¿pa lugar nadien ne riaannon zha Israel lo grëraa zha stib guiedz? ¿Pa rquiin ne scataa rio zho bey? Zootle lëë lalaquew tel niaca mine niacd zho zha Israel.

² Per led scada, no pe nacne non zho. Sac gon, ible lo zho psan Dios xtiidz me mazd padzeela.

³ Nli ndal zho rond xtiidz me, per led mincod ctsëë me xtiidz me, mine bneele me lo zho. ⁴ Niicxe tel zharaa quiayunctal miech xtol zho, sangue Dios ctsëëd me xtiidz me. Zigne zhobneeque lo Xtiidz me, zaatne rnee: “Mine rnee Dios, diidzli naca; niicle zha ne gacladz, guiend pe ncuanea glisqui zho lo me.”

⁵ Sca nac Dios, gacxe waa rnee me grëse zha ne runctal xtol, riegual ygaa zho guielnë ne cxeel me. Ga nagon, rlu ne mine nac diidzli, min co run me. Nana, ¿pe zlab ne nonguiel mine run me ga? ⁶ Mine nonguiel ga gon run me, sac tel gdziguien me grë zha ne runctal xtol, ¿zha naczhe guielwxtis ne dzigo gun me?

⁷ Nana, nogaa zho gnë, ¿per pe nacne glisqui Dios dol ne rdziuu ne, ni tel por lëëw rlu ne diidzli nac mine run me? ⁸ Per telne sca naca, rrieequia dzigo ib none gunctal ne xtol ne parne yquiaraa zdoo me ne. Ni nzian zha ne nobee xquielto naa, rnee zho ib min co noseed naa miech. Ni zha ne sca rnee, ib tedlaad zho lo guielnëdox ne riegual zho.

Grëse miech, ngoopdol nac zho

⁹ Nana, ¿pe zdieets ne dzigo ne nac ne zha Israel, nziuuraa ne lo grëraa miech stib guiedz? ¿Led scada gon! Niina blozh bzeet naa lo to, grëse ne ngoopdol nac ne,

zigtaa zha Israela, zigtagaa zha stib guiedza. ¹⁰ Zigne zhubneeque lo Xtiidz Dios, zaatne rnee:

¡Guiend miech ne zianaḽpaa miñe racladz Dios!

¡Ni tib zho guiend!

¹¹ Guiend zha ne niini guic;

guiend zha ne tsoxco yguib xnëz Dios.

¹² Grëse zho laa zho zie nëz ne nitlo zho;

niapse guielntseeb zianaḽ zho.

¡Guiend zha ne zianaḽ miñe racladz Dios!

¡Ni tib zho guiend!

¹³ Ro zhow,

masaque been cuent naca zig nac len grë baa ne noyodz ngutoo;

niapse diidz ne rquidie zho zhoob lo ludz zho.

Grë diidz ne rnee zho,

masaque naca zig nac xvenen grë meel dox;

¹⁴ niapse grë diidz dox, niapse grë diidznë rrieche ro zho.

¹⁵ Ni zhow,

masaque zombëzlew dien pa tsiegut zho samiech zho;

¹⁶ loxaque guielnë, loxaque guielzi rsañ zho zaatne rded zho.

¹⁷ Ib nañd zho ne zaacse gbannie zho samiech zho;

¹⁸ per ni Dios rdziebdraa zho.

¹⁹ Gacxe waa nroob nac guielnëdox ne yгаа grë zha ne runbey ley ni mband zho zigne naca, leḽ run zho grëtaa guielntseeb zig nac grë miñe goquiet nu. Ni niicle grëraa miech ne runbeyd ley, scaque ngoopdoḽ nac zho, ni ro zho guiend pe guiab zho lo Dios. ²⁰ Golgan sca ganle, grieelod guiaanmbe ne lo Dios, niicle paraa yquia ne gun ne miñe rnee ley; sinque par guien ne ganle ne ngoopdoḽ nac ne, gane biaan ley.

Silaa Dios miech zeeñe gnalo zho me

²¹ Sangué niina, tib ladle biaan ley, laa Dios bneedz stib mod ne guiaanwen ne lo me. Ni lo grêque guits ne ziaad ley, lo grê guits ne pquiaa zha ne biadteed Xtiidz Dios padzeela, ga raquieta. ²² Grêse miech tel chotaa nac zho, tel petaa been zho, ib ziaanwen zho lo Dios totsaque dib zdoos zho gnalo zho Jesús, dib zdoos zho gliladz zho me. Zha ne gliladzta me, sac led yed Dios rbe.

²³ Zigne rne naa ga, grêse ne miech ngoopdol nac ne lo Dios, ni palal rdzieeld gdziñ ne lo xquielndzon me. ²⁴ Per niina laa me blu ganle pa lotaa noxco me ne, gola zdoos me pxeel me Jesús bdiizh grêse xtol ne, laa ne biaanwen lo me. ²⁵ Laa me been min co parne glu run me guielwxtis, sac niicle bdizhd ne xtol ne, per pxeel me tib men ne bzhiee xchen bdiizha xcuent ne, lëë men co nac Jesús; gane niina grêse zha ne gnalo men co, zun me zho perdon grêta dol ne pxcw me been zho. ²⁶ Ni tib dol rapd me, ni scaque grê zha ne dib zdoos gnalo Jesús, sanmbe me zho lo xtol zho.

²⁷ Sca nagon psilaa Dios ne lo dol. ¿Cho nadien gacniats ga? Ni tib choot gacd gacniats, sac led por mine bdziuund new, sinque por grêta mine bded Jesús. ²⁸ Gocndion ne sca ganle: Niapse por dib zdoos miech gliladz zho Jesús, laa Dios ycaania zho; nacda por tso zho gun zho mine rnabey ley.

²⁹ Nana, ¿pe zha Israelse sca ycaania me? ¡Lëda gon! Grêse miech, sca ycaania me zho. ³⁰ Sac gon tibeyse ran Dios ne grêse ne; zigtaa zha Israela, zigtagaa zha stib guiedza, sanmbe me ne lo grê xtol ne, totsaque dib zdoos ne gnalo ne Jesús.

³¹ Nana, ne znu rcaania Dios ne, no zho sac rquiindraa ley. ¿Zha yquiind-zhew? Niinale ne znu dib zdoos ne riladz ne Jesús, rienraa ne pa rquiina.

4

Dib zdoo Abraham bnalo me Dios

¹ Zig nac pxozgoldoo ne Abraham, ¿pe been me ne laa Dios pcaania me? ² ¿Pe por guielwen ne been mew? ¡Lëda! Telne scaw, nrieelo niacniats me (niicle ne nëz lo Dios ni palal rieguiald niacniats me). ³ Sac gon rnee lo Xtiidz Dios, ne dib zdoo me bliladz me Dios gane pcaania Dios me zig tib zha ne peet xtold.

⁴ Zig nac tib zha ne run dziin, dimi ne razh zho ible rieguial zhow, rate zhow ga. ⁵ Sangué Dios zdoo me ral rcaania me miech, zha ne dib zdoo rnalo me, nacda por pe guielwen ne gun zho par guiab ne laa zho rieguiala. ⁶ Ye rey David bzeet guielbley ro ne rgaa zha ne sca rcaania Dios, ⁷ rëb David:

¡Wen zie zha ne run Dios perdon!

Niicle nroob guielntseeb ne been zho;

tel pe nactaa xtold zho, glisquidraa mew.

⁸ ¡Wen zie zho sac gunquizhdraa me zho grë xtold zho!

⁹ Nana, ¿pe loxaque grë zha ne nose bey zrieelo yгаа guielbley co, te ye grë zha ne noda ye? Nacda por bey, laa ne blozh bzeet ganle niapse ne dib zdoo Abraham bnalo me Dios, min co ne pcaania Dios me zig tib zha ne peet xtold; ¹⁰ sac gon gard pe bey ne tso me zeene pcaania Dios me. ¹¹ Pcaaniale Dios me dzigoraa bio me bey. Lega laa me biose bey co, zeena glu ne laa Dios pcaaniale me porne dib zdoo me bnalo me Dios. Mincocxe waa, Abraham nac dad lo grëse zha ne nod bey, ni dib zdoo zho rnalo zho Dios; ni scagaa Dios, rcaania me zho zig tib zha ne peet xtold. ¹² Ni meque nac dad lo grë zha ne no bey ni dib zdoo zho rnalo zho Dios, zigne bnalo me Dios zeene gard tso me bey co.

Zha goc mine bnee Dios lo Abraham

¹³ Psañle Dios diidz lo Abraham ne me guiaannie guidzliu, grë me zha ne grieequiaraa lo xti me; guiabd ne togo porne been me miñe nac xley zha Israela, sinque ne dib zdoo me bnalo me Diosa. ¹⁴ Nana, tel niaca zha ne gunse miñe nac ley, zha cose yгаа min co, rrieequia dzigo zhlëse ga bnalo Abraham Dios, niicle diidz ne psañ Dios lo me ga, nondaquew. ¹⁵ Sac nac ley gon, zha ne gunda zigne naca, laa Dios csiaabzi zho; laa zaatne guiendgaa ley, gacd guiab zho cho noguitsa.

¹⁶ Ne scacxe waa nac ley, gane niina lëese miñe no gun ne nac dib zdoo ne gnalo ne Dios par yгаа ne miñe psañle me diidz ga. Grëse ne yгаа min co, per nacdraaw dien cho zienal ley, cho zienaldgaaw, sac miñe nonraa, dib zdoo ne gnalo ne Dios zigne bnalo Abraham me. Mincoxe waa, rrieequia Abraham nac pxoz ne grëse ne, ¹⁷ zigne rëb Dios lo Abraham: “Laa naa bzo luu, luu gac dad lo nzian dii miech.” ¡Lëe Dios co nagon bliladz Abraham, me rbeeban grë mengut, ni niicle haxta grë ncuaane guiend, saa mew!

¹⁸ Ndaldox rëb Dios gac lo xti Abraham, ni bliladz Abraham miñe rëb Dios ga. Niicle ne zootle led ncuaane gacda, per me dib zdoo me bliladz me ne zaca, ni scagaa bdzin dze ne laaw goc. ¹⁹ Tibaque bnalo me Dios, niicle ne lala ziele xtse me (zig tib gayoole iz me), ni lala tsieel me Sar, nacd me wnaa ne gap mëed. ²⁰ Ib goc chopd guic me niab me bod nlid niac miñe bnee Dios ga, sinque dzigole dib zdooraa me bnalo me Dios; haxta rdeed me xquizh lo Dios, ²¹ sac nanpaa me men nroob nac Dios zun me miñe psañ me diidz ga. ²² Ne sca nagon dib zdoo me rnalo me Dios, gane pcaania Dios me zig tib zha ne peet xtold.

²³ Zhobnee lo Xtiidz Dios sca pcaania me Abraham, ni laaw zhobnee zeena gacndion ne ²⁴ ye ne scaania me ne zig tib zha ne peet xtold, totsaque dib zdoo ne gnalo ne Jesús, men ndzon ne rnabey ne; ²⁵ men ne gut ga bdiizh

me xtoḷ ne, meṇ ne brieeban ga, par glu me nli psanṁbe me ne nēz lo Dios.

5

Jesús rsaṁbe miech lo dol

¹ Nasi laa ne nacle zig zha ne peet xtoḷd, laa ne bi-aanwenle lo Dios porne dib zdoo ne rnalo ne Jesús, meṇ ndzon ne rnabey ne. ² Sac por grētaa miṇe bded Jesús, laa ne bgaa guielnzaac rii nacie me ne, ni ib csaand ne me. Tib guieḷbley nrooba lo ne, sac ndionṁpaa ne ib zgaa ne lo guieḷndzon ne no me.

³ Ni scaquegaa nagon none gley ne zeene pe guieḷnē ne nodziaṇ ne; sac ndion ne ganle, ga cseed ne lēb ne dziits so ne lo miṇe rliladz ne. ⁴ Ni zeene sca dziits so ne, zliadzraa ne dib zdoo ne; ni zeene dib zdoo ne rliladz ne, zacnaṁpaa ne ib zgaa ne miṇe rliladz ne. ⁵ Ni ndionṁpaa ne zgaa new, sac blu Dios rleynie me ne, pxeel me Espiritu Sant nacie ne.

⁶ Lēētaaque zeene rdzieldraa miech zha guṇ zho par guiaanṁbe zho lo dol, hor co laa Dios pxeel Jesús, biaad me gut me bdiizh me xtoḷ ne nac ne miech ngoopdol.

⁷ Ndion ne ganle, niicle tib miech ne peet xtoḷda, tib miech ne mazdraa wena, led lega grieequiad tib zha ne cueeladz xquieḷmban guet por zha. ⁸ Sangue Dios gon, niicle ne miech ngoopdol nac ne, blu me ganle pa lotaa nquialadz me ne, pxeel me Xpēed me Jesús, meṇ co bleeladz xquieḷmban gut me xcuent ne.

⁹⁻¹⁰ Gotsaa gwi ne ganle, zha nactaa guieḷnē ne bded Jesús psanṁbe me ne lo xtoḷ ne, psanwen me ne lo Dios; ni scaque nagon, ible me csilaa ne lo grētaa guieḷnēdox ne csiaab Dios ygaa grē miech ntseeb. Ne nligaa, csaand me dziaṇ ne guieḷnē co; sac gon, tel scataa miṇe been me por ne zeene nac ne tib miech ngoopdol, zeene scataa

ntseeb goc ne blëenie ne Dios, ¿pe lel na dzigo ne laa ne biaanwenle lo Dios, laa ne biaanle zig tib zha ne peet xtold? ¹¹ Gacxe waa, niina ne psanwen Jesús ne lo Dios, none ine gley ne ne laa ne ngable lo Dios.

Zha nacne biaan dol

¹² Znu gon nacne laa dol biaan: por mine been Adán bind me xtiidz Dios, min co nac ne biana. Ni por lëew pquiaqui laa guielgut bianaque, blozh ga grëse miech laa zho ret, sac grëse zho, tsod zha ne gunctald xtol. ¹³ Desde hor co biaan runctal miech xtol zho. Grëse miech ne bre lo guidzliu, desde Adán haxta len dze ne laa Moisés pcaania ley, beenctal zho xtol zho, niicle ne guiendpaa tib ley hor co nlu ne doła. ¹⁴ Gacxe waa ye zho, grëse zho gut; niicle ne bdiitsd zho merpaa xtiidz Dios zigne been Adán.

¹⁵ Nli tib guielnë ga psan Adán, per niinagaa mazdraa nroob guielnzaac ne rneedz Dios lo ne. Por falt ne been Adán, biaan grëse ne ne nac ne miech laa ne no guet; per niina ne bиаad stib men ne beend ni tib falt, por min co laa Dios rquia zdoo ne grëse ne, laa me rneedz tib guielmban ndzon lo ne; lëë men co nac Jesús. ¹⁶ Tibaque nac dol co been Adán, per grëse miech biabzi; sangue Jesús zeene laa me bиаad, grëse ne ne nac ne miech psilaa me ne lo grëtaa xtol ne, psanwen me ne lo Dios. ¹⁷ Dol ne beense Adán ga, min co pquiaqui grëse ne ne nac ne miech, laa ne biaan ladznia guielgut; sangue niina ne bиаad Jesús, zrieelo ygaa ne tib guielmban ndzon. Guielmban ne ral zdoo Dios gdeed me lo grëse zha ne gbig lo me gun me zho perdon. ¹⁸ Sca nagon naca: por falt ne been Adán ga, grëse ne ne nac ne miech laa ne biabzi, per zeene laa Jesús bиаad, pquia zdoo me ne masaque me bdiizh grëse caxtigw ne riogual ne ga, laa me psanwen ne lo Dios parne grieelo ygaa ne tib guielmban ndzon. ¹⁹ Golgan ganle, porne

bdiits Adán xtiidz Dios, grëse ne ne nac miech laa ne goc zha ngoopdol; per scagaa, por bzoob Jesús grëse xtiidz Dios, zha ne gacladztaa, zrieelo guiaanwen zho lo me.

²⁰ Ible laa ley biaan, par glu ganle pa lotaa nac grë falt ne noyun miech lo Dios. Per niicle scataa nac grë dol co, per blu Dios ganle mazdraa rquia zdoo me miech. ²¹ Masaque bnabey dol miech, pxeela zho nëz ne nitlo zho; sangue zeene laa Jesús baaad, psanwen me ne lo Dios, gane niina zha ne gnalotaa Jesús zgaa zho tib guielmban ndzon.

6

Zha ne mbanniele Jesús

¹ Laa ne bdzianle ganle zha noxcotaa Dios ne. Nana, ¿pe zdzieets ne dziuunctalraa ne xtol ne zeena tsoxcoraa me ne? ² ¡Lëdraaw ga gon! Nodraa ne dziuun ne dol, sac gon, laa ne nacle niina zig tib zha ne gutle nëz lo dol.

³ Golgan ganle, zeene laa ne bziaab xnëz Jesús ni brobnis ne, rriequia gut ne ga zigne gut me. ⁴ Zeene brobnis ne rriequia bioliu ne ga, zigne bioliu Jesús. Ni zigne brieegan Jesús (por poder ndzon ne rap Dios), scaque ne rriequia brieegan ne, stible guielmban ne rdziaap ne.

⁵ Ni zigne sca rriequia gut ne zeene gut Jesús, scaque-gaa ndionpaa ne zbeegan me ne zigne brieegan me. ⁶ Ndion ne ganle, miech ne goc ne glo zeene scataa bional ne guielntseeb, rriequia ye miech co pquianie me lo cruz. Ga bnitlo mine goc ne ga, zeena ygadoodraa ne lo dol; ⁷ sac gon, deque bnitlo grë mine goc ne glo, grielodraa gnabey dol ne.

⁸ Nana, telne scale gutnie ne Jesús, ndionpaa ne ib zbannie ne me.

⁹ Ndion ne ganle brieegan Jesús, ni gdzindraa dze guet me. Grielodraa pe gun guielgut me.

¹⁰ Tibaque vuela gut me bdiizh me xtol grëse miech, sangue niina mban me ni Dios mbannie me. ¹¹ Scagaa to nasca, golguien ganle laa to gutle lo dol, nodraa gnabey dol to stib, sinque laa to mbanle niina par gun to mine rnabey Dios. Golguien ganle, Jesúsle nacie to.

¹² Nana sca, gdeetraa to diidz gnabey dol xcuerp ben to i, tso to gun to grë ncuaane ndzinlid ne racladz xcuerp to. ¹³ Ib gdeete to diidz guiab to lo dol stib, gun to grë guieIntseeb; sinque golsan to lадznia Dios, ine golgun grë mine racladz me. Golguien ganle, laa to gutle lo grë dol, Diosle mbannie to niina; ¹⁴ zeena scagaa gnabeydraa dol lo to, zigne beena to zeene scataa bioxco to mine rnabey ley. Sac gon rnabeydraa ley to niina, laa Dios blule ganle pa lotaa nquialadz me to biaadsilaa me to.

Nli nquialadz Dios ne, rnabeydraa ley ne. ¹⁵ Per nana, ꝑe ne rnabeydraa ley ne, pe ne nquialadz Dios ne dzieets ne dziuun ne grëtaa ncuaane guntal xtol ne? ꝑLëda ga gon! ¹⁶ Nanle to ganle, tib zha ne nanle cho lo yquia zho dziin, lo zha co ngadoo zho ni mine rnee zha co none gun zho. Zig nac zha ne ngadoo lo dol, niapse dol run zho ni mine tsieguial zho laa zho nitlo; sangue zha ne run mine rnabey Dios, scaania Dios zho zig tib zha ne peet xtol d. ¹⁷ Nli glo lo dol ngadoo to, per xquizh Dios zeene laa zho biadseed to Xtiidz me gocnan to zha laa to lo dol, laa to bliladza ni noxco to mban tow niina. ¹⁸ Ni zeene laa to brieeladznia dol, laa to bgab lo Dios; zeena mine rnabeyle me mincole gun to. ¹⁹ Znu bzet naa grë min rii lo to, zeena guien to zha naca.

Nana sca, zigne scataa bio to lадznia dol been to grëtaa guieIyozh, grëtaa guieIntseeb, scagaa niina golsan to lадznia Dios, golban zigne rnabey me, zeena lozh guiaanmbe to zigne racladz me. ²⁰ Zeene scataa ngadoo to lo dol, ib wbande to zigne rnabey me.

²¹ ¿Pe nadien needz dol lo to? Lëë gdib mine ngaa to laa to nitlo. Zig nac niina, haxta rtoladz to zeene rsoladz to grë ncuaaane been to hor co. ²² Sangue niina, ne laa to brieete ladznia dol laa to ngab lo Dios, ible ziaanmbe to zigne racladz me ni zгаа to tib guielmban ne gdziind dze lozh.

²³ Sac gon, zha ne runctal xtol, lëë gdib mine tsieguial zho laa zho nitlo; sangue zha ne gbig lo Jesús, mine ral zdoo Dios ygad me lo zho nac tib guielmban ne gdziindraa dze lozh.

7

¹ Bets, bzian, to ne nac to zha ne runbey Xley Dios, nanwen to ganle, zeene zombanse miech dzigo rrieelo rnabey ley co zho.

² Zig nac tib mgui ne rtsieelnia, rnabey ley ne mguise gbannie wnaa ne nac tsieel mgui. Per tel gzoob ne glo mgui guet, dzigo gacdraa gnabey ley ne mguipaa gbannie wnaa co; telne gacladz zho ctsieelnia zho stib mgui, zaca.

³ Nli nonguielda ga gon wnaa ctsieelnia zho stib mgui laga bii zomban tsieel zho; laa zeene gutle tsieel zho, led doldraaw yguib zho stib zha ne ctsieelnia zho.

⁴ Bets, bzian, scadaa nagon bzhaac to. Zeene sca gut Jesús, rrieequia ye to gut ga gane niina ngadoodraa to lo ley, niicle lëëgaaw grielod gnabeya to. Jesús, men ne brieaban ga, mele nac tsieel cub to niina. Niinasi, zrieelole gban to zigne racladz Dios; ⁵ sac glo (zeene scataa bdziunctal ne xtol ne, bdziun ne grëtaa ncuaaane nonguieldraa niicle ne ndionpaa ne pe nac mine zhobnee lo ley no dziun ne), niapse grë ncuaaane nxeel ne zaatne nitlo ne, ncuuan co bdziun ne. ⁶ Blactaa bgadoo ne lo ley, sangue niina rrieequia gutle ne nëz lo ley, laa ne mbanle zigne rnabey Espíritu Sant.

Rca dol gac minē rnabey ley

⁷ Nana, ¿pe zdieets ne dzigo por leypaa rdziuunctal ne xtol̄ ne? ¡Coo, led scada! Tel̄ naa gon̄, ib niacnand naa pe nac dol̄ tel̄ne guiend ley. Niacnand naa ne dol̄ ga gzoobladz ne chen̄ ben̄, tel̄ne niacnand naa ne rnee lo ley: “Gzoobladz luu chen̄ ben̄.” ⁸ Zeene gocnan̄ naa zha nac ley, dzigora a bien̄ naa niapse dol̄ nac minē noyun̄ naa; sac zeene guiend ley, rlud pe nac dol̄.

⁹ Glo zeene riend naa zhapaa nac ley, tibaque rzaac naa ib peet dol̄ rapd naa; per zeene gocnan̄ naa zha nac ley, bien̄ naa ne ib raguial̄ naa nitlo naa, sac dol̄ quiayun̄ naa. ¹⁰ Nli laa ley biaan̄ zeena guien̄ ne zha grielo ygaa ne guielmban, per lel̄ bluw ne raguial̄ naa nitlo naa sac ngoopdol̄ nac naa. ¹¹ Ne nligaa bdziitnie dol̄ naa, minē rsopaa ley diidz nod gun̄ miech mincopaa ben̄ naa; ni blozh ga, lëëque ley blu ne ib raguial̄ naa nitlo naa. ¹² Niicle ne scaw, per Dios psana ni rquiin grë minē zhobnee low.

¹³ Nana dzieets ne: conque tel̄ne wen nac ley, ¿zha nac dzigo ne lëëpaaw rlu ne rioguial̄ ne guet ne? ¡Coo, led scada! Sinque znu naca: dol̄ pteedquie ne lадznia guielgut. Ga rlu gan̄le zha nactaa dol̄, sac gon̄ lëëque ley pquiin dol̄ pteedquiew ne lo guielgut. Ga blu ley gan̄le zha ntseebtaa nac dol̄. ¹⁴ Gotsaa gwi ne gan̄le wen ley, led leyd rxin̄ sinque ne rxin̄; sacne rrieequia ngadoo xcuerp ne lo dol̄.

¹⁵ Tel̄ naa, riend naa pe nacne znu rac naa, niicle ne racladzpaa naa gun̄ naa ncuane nonguiel̄ per nëda, lel̄ ncuane rzoobladz naa min̄ co run̄ naa. ¹⁶ Grë ncuane run̄ naa, now rienpaa naa nonguiel̄da; haxta guic naa, zdoo naa, rien̄ naa wen ley sinque naa quiaguits minē rnabeya. ¹⁷ Nana, niicle ne rien̄ naa scaw per gacd pe gun̄ naa, sac ngadoo xcuerp naa lo dol̄, masaque dol̄

rcheep naa ruṅ naa ncuaane ndzinlid. ¹⁸ Rien naa miech ngoopdoḷ nac naa, ni palal ncuaane ndzinli gacd guṅ naa; niicle ne racladz naa gac-wen naa, per rrieeḷoda. ¹⁹ Zeene racladz naa guṅ naa ncuaane rquiin, per rrieeḷod guṅ naaw; laa zeene ni naa guṅdraa naa ncuaane ndzinlid, leḷ mincole ruṅ naa. ²⁰ Ni ne znu leḷ grē ncuaane racladzd naa, min co ruṅ naa, gase rlu ne led naadse quiayun grē ncuaan co; sinque doḷ quianabey xcuerp naa ruṅ naaw. ²¹ Rien naa niicle ne racladzpaa naa guṅ naa ncuaane wen, per leḷ guieḷntseeb ruṅ naa. ²² Zdoḷ naa, guic naa, rleynie naa Xley Dios, racladz naa gban naa zigne rnabey me; ²³ per dzigo rtse doḷ lo naa, rrieeḷod guṅ naa ncuaane nonguiel. Masaque doḷ rnabey xcuerp naa, racladzda guṅ naa ncuaane rnabey Dios; sac ngadoo xcuerp naa lo doḷ.

²⁴ ¡Probsaxe naa, znutaa nac xcuerp ngoopdoḷ naa nu! ¿Cho samiech ne dieṅ grieelo csilaa naa low; sac ncuaane gnitlo naa min co mazdraa rdziladza?

²⁵ ¡Xquizh Dios pxeel me Jesús biaadsilaa me ne lo doḷ!
¡Jesús nac meṅ ne psilaa naa!

(Znu nagon rzac naa: rien naa nonguiel guṅ naa mine nac Xley Dios, per xcuerp naa leḷ laaw zienal mine rnabey doḷ.)

8

None gban miech zigne racladz Espíritu Sant

¹ Laa ne gocndion nasca ganle, zha ne ngab lo Jesús ndziibdoldraa zho, ² sac zha ne ngab xnēz me, laa Espíritu Sant psilaale zho lo doḷ, laa me psilaale zho ladznia guieḷgut, laa me bdeedle tib guieḷmban cub lo zho.

³ Wlaltaa ib brieelod ley nsilaaw ne lo doḷ, gane mazd laa Dios pxeel Xpēed me biaadsilaa ne. Brieelod ley, sac grēse miech laa ne tsienal zho mine rnabey ley, mazdraa zienal zho ncuaane runctal xtoḷ zho. Gane zeene pxeel

Dios Xpëed me, goc me miech (lëëraasi ni tib doĭ beend me), meŋ co gut bdiizh grëse xtoĭ ne, dzigo ga laa me psilaa ne ladznia doĭ.

⁴ Gacxe waa, niinasi zrieelo dziuun ne grë mine rnabey ley, per none gdeed ne diidz guional ne mine rnabey Espíritu Sant, ni lalnu gdeete ne diidz gac mine racladz xcuerp ne nu.

⁵ Grëse zha ne mban zigne racladz xcuerp ngoopdoĭ zho, loxaque grë miŋ co rioxco zho; laa zha ne mban zigne racladz Espíritu Sant, mine rnabey Espíritu Sant rioxco zho.

⁶ Zha ne sca rioxco loxaque mine racladz xcuerp ngoopdoĭ zho, nëz ne nitlo zho ga zie zho; sangue zha ne rioxco mine racladz Espíritu Sant, laa zho zie nëz ne yгаа zho tib guieĭmban; peet dzeb, peet zhgab ctsebdraa zho.

⁷ Ni stiba, zha ne rioxco loxaque mine racladz xcuerp ngoopdoĭ zho, rlëënie zho Dios ga, sac nëd zho gban zho zigne rnabey xley me; ni niicle gacladzгаа zho, grieelod zho. ⁸ Miŋcocxe waa, ib rzacd zdoos Dios grë ncuaane run zho.

⁹ Sangue to, mbandraa to zigne racladz xcuerp to, sinque laa to mban zigne racladz Espíritu Sant. Sca mban to, sac Espíritu Sant nacie to. Nanle to ganle zha ne nacie Espíritu Sant, nliid xnëz Jesús no zho. ¹⁰ Ni to ne nac to zha ne nole xnëz Jesús, ible zгаа to tib guieĭmbandzon, sac laa Dios psilaale to lo doĭ. Nli zig nac xcuerp to, ncuaane nitlo naca, sac por doĭ biaan sca no gaca; sangue zhiespírituw, nitloda. ¹¹ Dios bleeban Jesús, ni scagaa telne nli nacie to zhiEspíritu me, meque cueeban to.

¹² Bets, bzian, nodne dziuun ne ncuaane racladz xcuerp ngoopdoĭ ne, zig nac zeene pe nzëëb ne low. ¹³ Sac telne grë ncuaan co tsienal to, ible znitlo to; sangue telne gnab to gacnien Espíritu Sant to csaan tow, dzigo ible zгаа to

tib guieḷmban. ¹⁴ Sac grēse zha ne zienal zigne racladz zhiEspíritu Dios, ga rlu ne nlipaa xpēēd Dios nac zho.

¹⁵ Golguien ganle, laa Dios bneedz zhiEspíritu me lo to, sac xpēēdle me nac to niina. Tsode to sca gdziebd to me, zig nac zeene cho tib ngundziin win nac to lo me. Xpēēd me nac ne, gacxe waa zac tibililadz gnee ne lo me guiab ne: “¡Papá yeen!” ¹⁶ Ni Espiritu coque runquien ne ne nli xpēēd me nac ne.

¹⁷ Nana ne laa ne nacle xpēēd Dios, scagaa dzigo ye ne ible zgaa ne grētaa ncuaane bdeed me lo Jesús.

Nli zgaa ne lo grē guieḷndzon ne no Jesús ga, per scagaa none dzian ne grē guieḷnē niina ne laa ne ngab lo me.

Guieḷndzon ne naraa guiaad

¹⁸ Guieḷnē ne dzian ne lo guidzliu rii, loxaque ne ngab ne lo Jesús, led ncuaane rnad ga; mazdraa nroobdoo nac lo guieḷndzon ne naraa dzian ne. ¹⁹ Zig nac grētaa ncuaane bzaa Dios, masaque quiambēznēw gdziḷ dze zeene laa grē zha ne nac xpēēd Dios yгаа lo guieḷndzon co; ²⁰⁻²¹ sac gon, gaḷ dze co laa guidzliu guiaanmbe lo grētaa ncuaan paat rquiind, lo grētaa guieḷntseeb ne no low niina. Dios bdeed diidz biaan grē ncuaan co low, per zeene gaḷ dze co, zeene laa grē zha ne nac xpēēd Dios laa lo grētaa guieḷntseeb, yew laaw laa.

²² Laga quiambēz grē ncuaan co gdziḷ dze co, masaque mban raca, rzaca zig rzac tib men wnaa ne quiayal xpēēd.

²³ Ni ndion ne ganle, haxta ne, ne nac ne zha ne nacie Espiritu Sant (zeena glu ne ible zgaa ne grētaa ncuaane gneedz me), mban rac ne quiambiaaz ne gdziḷ dze co, zeene laa Dios ctsēē xcuerp rii ne ni ycaania me ne zig xpēēdpaa me.

²⁴ Ndion ne ible zbee Dios ne lo grētaa ncuaane rac lo guidzliu rii, per nana laa ne quiambiaaz dzianpaa ne

gaca. Tib ncuaañe lëë ranle ne noyac, nod pe nacne yquiambëzraa new, ²⁵ per zeene quiambëz ne tib ncuaañe naraa gac, dzigo nodne guieed ne, sinque ine tiblifique gac ne yquiambëz new.

²⁶ Ni scagaa zeene lëbdraa ne, riendraa ne zha gun ne, Espíritu Sant nac men ne gacniën ne. Zig nac zeene gzodiidznie ne Dios, tel nesew nanð ne zhapaa nonguiel gnee ne lo Dios, dzigo Espíritu Sant runcnee ne grë diidz ne riënd ne zha nac. ²⁷ Ni Dios ne nac me men ne nanpaa pe rza zdoo miech, riën me pe rnee Espíritu Sant, sac mine racladz Dios gac miñ co rnab me.

Tsod ncuaañe yquiaaqui csaanladz Jesús ne

²⁸ Ndion ne ganle, zha ne nli dib zdoo rleynie Dios, zha ne rioxco gac grë mine racladz me, grëse ncuaañe rded zho, led lega rdete zhow, sinque no zaatne rquiina lo zho. ²⁹ Ni ndion ne ganle, zha ne nanle me ygab xnëz me, desde mazd glow, pso me zho gac zho zig nac Xpëed me Jesús. Lo grë zha ne nac xpëed me, Jesús nac men nroob. ³⁰ Ni grë zha co, laa me quiabedz zho, quiasilaa me zho lo dol, laa zho noyaanwen lo me; zeena ygaa zho lo guielndzon ne no me.

³¹ ¡Zha nactaa ncuaañe lëë run Dios! Nana, tel scataa racnie Dios ne, ¿cho nadiën grieelo lega pe gun ne?

³² Golgotsaa gwi ne ganle, haxta xpëed me bdeed me gut xcuënt ne, grëse ne ne nac ne miech. Nana, ¿pe lel grë pe stib cos dzigo yquia zdoo me gneedz me lo ne?

³³ ¡ble Dios bzooblo ne, gacxe waa, ¡choot rieguald glisqui gnë lëda nodziun ne! Sac gon, Dioszhal psanmbe ne lo dol. ³⁴ ¡choot rieguald ycaadz dol ne! Sac gon laa Jesús gutle bdiizh me xtol ne; per brieëban me, ni na laa me zob cue Dios zaatne riegual me nac me men non. Ga no me quianab me lo Dios por ne. ³⁵ ¡Tibaque rleynie Jesús ne! Zeene nodzian ne guielnë, zeene mban rac ne, zeene

rtsidil miech ne, ib guiabd ne togo bod rleynied me ne. Niicle zeene guiendgaa pe gow ne, guiend pe gacwxab ne, o noxtseebgaa ne guet ne, ib guiabd ne togo psaanladz me ne. ;Tibaque rleynie me ne! ³⁶ Ni zig nac xcuent guielgut, laaw raquetaque lo Xtiidz Dios, zaatne rnee:

Grëse no ne nac no zha ne ngab lo luu,
tibaque noxtseeb no lo guielgut;
masaque rzac miech no zig rzac zho grë mëcwxiiil ne gollë guet.

³⁷ Niicxe peraa waa dieed ne, zdziuuñ ne gan low ni palal csañwinda ne, sac Jesús nacie ne; ni rleyniedox Jesús ne.

³⁸ Nanween naa tsod ncuaane yquiaaqui csaanladz Dios ne:

per ni guielgut,
per ni guielmban,
per ni anjl,
per ni mendox,
per ni grë ncuaane noyac niina, grëgaa ncuaane naraa gaca.

³⁹ Niicle grë ncuaane no glaa zhan gbaaw,
niicle grë ncuaane no quietraa zhan guidzliuw,
niicle grëragaa ncuaane bzaa Dios.
;Ni tiba ycada, sac tibaque rleynie Dios ne! Ni laaw blule me ganle, zeene pxeel me Jesús (men ne rnabey ne), men ne gut bdiizh grëse xtol ne.

9

Ible Dios bzooblo zha Israel

¹⁻³ Bets, bzian, ;blactaa racladz naa guien grëraa zha Israel cho nac Jesús! Rquianë zdoo naa zho nac zho menladz naa, tibaque mban rac zdoo naa rsoladz naa zho. Haxta Jesús, haxta Espíritu Sant nan ganle rquiad zdoo naa naa niicle maase gdzibdee miech naa, maase nitlo naa

guia naa zaatne gan_udraa naa Dios, tel_une niaca por min_u co laa zho guien_u zha gbig zho lo Dios.

⁴ Blactaa quiayacnien_u Dios zho, ni rond zho xtiidz me. Bzooblo me zho gac zho zha ne ygab lo me, haxta bzënie me zho, gon_u zho gan_ule men_u ndzon nac me; biaan_u zho diidz grë zho me zha mod gun_ulay me zho. Psa_u me ley lo zho zeena guien_u zho zha gban zho, ni psa_u me diidz lo zho zha gleynie zho me. Nzian grë ncuaane bnee me gdeed me lo zho. ⁵ Lëë pxozgoldoo zho ga goc Abraham, goc Isaac, goc Jacob, ni lo dii co ga brieequia zha ne bded zig men_ulidz Jesús. Me nac Dios, me rnabey grëtaa ncuaane no, ni me rieguial_u gacnon gzataa dze. Ible sca rieguiala.

⁶ Nana, no zho guiab gocdaque grë min_u bnee Dios ga yгаа zha Israel. Per led scada. Sinqe lëë min_u co rgaa zha ne nlipaa rnalo Dios, sac zha co nac zha ne nlipaa nac zha Israel. ⁷ Nacda ne loxaque ziaad zho lo xtii Abraham, laa zho nacle merpaa zha Israel; sac gon_u, niicle ne nzian mëéd pquianie Abraham, per rëb Dios loxaque Isaac gac cuent zig xpëéd Abraham. ⁸ Gase nagan_ule rlu, zig nac niina, grë zha ne ziaad lo xtii Abraham, led grëd zho ngab lo Dios; sinque zha ne bzooblöle me zigne bzooblo me Isaac, zha co ngab lo me. ⁹ Sac zig nac Isaac, ible Dios bnee lo Abraham grop Sar, ne laa Isaac gac mëéd lo zho.

¹⁰⁻¹¹ Ni scasaque xpëéd Isaac. Bdzi_un dze, zeene laa Isaac ptsieelnia wnaa ne lë Rebec, dzigo gop Rebec tibnëz mëédbgui. ¹² Bii zoney Rebec grop mëdyeen_u co, laa Dios bzooblöle win ne brieelë Jacob rëb me, ne ible Jacob gac zha non lo Esaú, win ne glo gal. ¹³⁻¹⁵ Laaw zhobneeque lo Xtiidz Dios, zaatne znu rëb me: “Ible Jacob bzooblo naa been_ulay naa, bzoblod naa Esaú.” Gard gal grop mëéd co, per ni gard gacna_un win zha nac guiel_untseeb, zha nacгаа guiel_uwen, laa me bzooblöle tib win. Ga nagon_u, blu Dios ne

mese nac men ne rieguial rzooblo tel cho zha ne ygab lo me, nacda por pe ncuane noyun zho.

Nana, ¿pe zdieets ne guieIntseeb ga sca run Dios? ¿Led guieIntseebda! Tib vuelt rëb me lo Moisés: “Zha ne gacladz naa yquia zdoo naa, squia zdoo naa zho.” ¹⁶ Ga nagon, zha ne runlay me, nacda porne zha rquiaguiba, o rioxcogaa zho ygaa zhow; sinque laa zho rgaaw, porne me rquia zdoo zho. ¹⁷ Gotsaa gwi ne ganle zha beenndip me zdoo rey Egipt. Lo Xtiidz me zhobnee zeene rëb me lo rey co: “Ible laa naa bzo luu nac luu rey, luu yguib glu naa poder ne rap naa, zeena dib lo guidzliu guien miech ganle naa nac Dios.”

¹⁸ Ga nagon rlu, zha ne gacladz me yquia zdoo me, rquia zdoo me zho; ni scagaa, zha ne gacladz me gunndip me zdoo, runndip me zdoo zho. ¹⁹ Nana, no zho gnë: “Telne scaw, ¿pe nac dzigo rlisqui Dios mine run miech, tel mezhall r nabey zha nac zho tib tib zho?” ²⁰ Per nana, ¿cho nac ne par glisqui ne mine run Dios? Zig nac tib guies ben, niacxe zlisquiw lo men ne bzaaw, guiaba: “¿Pe nacne znu bzaa luu naa?” ²¹ Led zha ne run dziin co, zrieelo gzaa zho tib guies zigne gacladztaa zho; tib lë ben ne xen zho, zac gzaa zhow tib guies niow, o gzaagaa zhow tib guies beelze.

²² Scaquegaa nagon rzac Dios miech. Grë zha ne psanle me nitlo, ible rap me derech csiaabzhian me zho, glu me poder ne rap me; per laa me bii quiaayap zho paciens nieeda gdzin dze co. ²³⁻²⁴ Grëgaa zha ne bzooblo me ygaa lo guieIndzon ne no me, zigtaa new ne nac ne zha Israel, zigtagaa zha stib guiedza; ible rap me derech bzooblo me ne, sac rquia zdoo me ne. ²⁵ Golsoladz ganle zha bzeet Osé, men ne biadteed xtiidz Dios padzeela. Bzeet me ible zbedz Dios grë zha ne nacd zha Israel ygab zho lo me, zeena gleynie me zho niicle ne rleynied me zho glo. ²⁶ Laa stib

lugar bzeet Osé, zha bnee Dios lo zho, rëb me: “Ngabde to lo naa, per zdziñ dze ne laa to gac xpëed naa, ne nac naa Dios nguiamban.”

²⁷ Laa Isá stib meñ ne biadteed xtiidz Dios padzeela, zeene bzeet me zha Israel rëb me: “Niicle ne ndaldoo nac zha Israel pale yuzh ne ndxie ro nisdoo, per zhis zho gac zha ne ycaania Dios; ²⁸ sac ziaadyoble gun Dios xquielwxtis me lo guidzliu, zigne bneele me.” ²⁹ Miñ co ga bzeet Isá mazd glo, rëb me: “Telne niaca mine yquiad zdoo Dios zha Israel, znitlo me zho grëse zho zigne bnitlo me zha Sodom ni zha Gomorr.”

Zha ne nacd zha Israel laa zho wbig lo Dios

³⁰ Nana guiab ne: ¿Zha nac dzigo ne rcaania Dios zha zit? Laa me rcaania zho niina sac dib zdoo zho rnalo zho me, niicle ne wlaltaa ib bioxcod zho dien zha nsilaa me zho lo dol. ³¹ Laa zha Israel, niicle ne rioxco zho run zho grë mine rnabey ley parne csilaa me zho, per ib laad zho lo dol sca. ³² Laad zho, sac zienied guic zho gnalo zho Dios, rzac zho por grë ncuane gunse zho laa zho laa lo dol. Miñcocxe waa, zeene laa Jesús biaad, bzhaac zho me zig tib quie ne rriel ni ne riab ne liu. ³³ Lëë miñ co ga zhobnee lo Xtiidz Dios, zaatne rnee:
Sxel naa tib meñ lo zha Israel,
me gac zig tib quie ne griel ni zho;
sangue zha ne dib zdoo gnalo me,
tsod dze ne tso zho guielñë, guiab zho pe nacne bnalo zho me.

10

¹ Bets, bzian, ne nlipaa rzaac naa tebaa zha laa grëse zha Israel lo dol, tibaque rnab naa lo Dios guien zho gbig zho lo me, zeena laa zho lo grë xtol zho.

² Parga nli ran naa noxco zho gbig zho lo me; per rund zho mine no gun zho. ³ Ib rien d zho zdoo Dios ral rsilaa me

miech lo dol, laa zho rzac por miñe guñ zho laa me csilaa zho. Ib nēd zho guñ zho miñe racladz Dios. ⁴ Sac gon, laa Dios racladz Jesús gnalo zho zeena guiaanmbe zho lo grēse xtoł zho; sac Jesússe nac meñ ne brieelo been grēse miñe rnabey ley.

⁵ Bzeet Moisés rēb me, zha ne gnalo ley ne lēew csilaa zho, none guñ zho grēse miñe rnabeya; ⁶ sangue zha ne gnalo Jesús ne me csilaa zho, nacda dien peraa guñ zho. Nacda ncuaane tso zho guiab zho, tebaa zha tsie zho lo me gbaa, gnab zho csilaa me zho (ncuaane gacda ga, dzigo rriequia racladz zho quiet me ga stib); ⁷ o guiaabгаа zho tsie zho zaatne noliu grē ngutoo, tsienab zho lo me csilaa me zho (ncuaane gacdaque ga, ni stiba led gad no me, laa me brieebanle). ⁸ Rquiind paraa tsieguib zho csilaa me zho, zig rzac zho zdoo zho, zig rzac zho ro zho, sca gax lo zho zo me quiambēz me csilaa me zho. Miñ co nac miñe noseed no miech, rnee no lo zho: ⁹ Zha ne cueero guiab zho Jesús nac meñ ne rnabey lo xquielmban zho, ni dib zdoo zho gliladz zho nli bleeban Dios me, dzigo silaa me zho lo grē xtoł zho. ¹⁰ Sac none dib zdoo ne gliladz ne, dzigo sanmbe Dios ne lo dol; ni none cueero ne pe nac miñe rliladz ne, dzigo scaania me ne. ¹¹ Rnee lo Xtiidz me: “Zha ne dib zdoo gliladz Jesús, quitnied me zho.”

¹² Grēse miech, niicle zha Israela, niiclegaa zha stib guiedza ible sca ycaania me zho, sac led yed me rbe; me rnabey zho grēse zho, ni grētaa ncuaane rap me, zdeed mew lo zha ne gnaba lo me. ¹³ Rnee lo Xtiidz me: “Grēse zha ne gnab lo Dios csilaa me zho lo dol, ible silaa me zho.”

¹⁴⁻¹⁵ Nana, no zho gnē: ¿Per zha gnab zho lo me, ni runbeyd zho me? Nli gunbeyd zho me, tel niaca miñe gard cho cxeel zha ne tsienee Xtiidz me lo zho, parne gon zho cho nac me. Ni miñ co rzeet Isá, zeene rēb me: “¿Zha wentaa ziaad zha ne ziaadnie Xtiidz Ndzon Dios!”

¹⁶ Rgaaz Xtiidz Dios, per led grëd zho rzoobdiaga, zig rbiireque Isá, rnee me: “Dios, bui ganle choot nëd gliladz Xtiidz luu, miñe rne naa.” ¹⁷ Sac gon, parne dib zdoo ne gnalo ne Dios, ib none yquiaadiag ne Xtiidz me ganle cho nac Jesús.

¹⁸ Zig nac zha Israel, ¿niacxe gard gon zho Xtiidz Dios? ¡Binle zhow! Blactaa zha ne ziyadnee Xtiidz me, haxta zaatne mazdraa zita, laa miech quiayacnañ Xtiidz me.

¹⁹ No hor rne naa: ¿Pe ib rienđ zha Israel, telne gbıgd zho lo me csilaa me zho, laa me csilaa miech stib guiedz? ¡Per rienle zhow! Sac bzeetle Moisésa padzeela, zeene rëb Dios laa me ycaania miech stib guiedz, zha ne ib peet rienđ; zeena tednë zdoo zha Israel, togo ziaa zho biini.

²⁰ Mincoque ga pquiaa Isá, zeene rëb Dios:

Grë miech ne ni zienied guic yguib zho naa, laa zho beenbey naa.

²¹ Laa zha Israel, blactaa bzëëb nia naa lo zho ni naa niacnie naa zho, per pa nion zho xtidz naa, leļ gocntseeb zho lo naa.

11

Zha Israel ne wbig lo Dios

¹ Per guiabd ne togo psaanladzle Dios zha Israel. Golgan ganle, zha Israelacxe waa nac naa, zha xtii Benjamín, zha xtii Abraham nac naa; ² dzigo led psaanladzd Dios zho (nac zho zha ne padzeelale bzooblo me ygab lo me).

Golşoladz ganle, zha rëb Dios lo Lí, men ne biadteed xtiidz Dios padzeela, zeene bzodiidznie Lí Dios ³ grëtaa ncuane noyuñ zha Israel, ptsil zho zaatne riegañ grë miech me, beet zho grë zha ne pxeel me noteed xtiidz me, ni laa zho quianałaque gut zho Lí. Rzac Lí guiendraa zha ne ron xtiidz me, ⁴ dzigo hor co rëb me lo Lí: “Led tıbd luu

riaan, no zgadz mil zha ne gard yquitsgzhib lo Baal, naa bzooblo zho ygab zho lo naa.”

⁵ Scaquegaa niina nagon led gröd zha Israel psaanladz Dios, no palal zha ne pquia zdoo me ble me zho ygab zho lo me. ⁶ Rne naa pquia zdoo me zho, sac guiabd ne togo por demas wen zho gane ble me zho; sac gon, tel por wen zhow, nlid dzigo ne rquia zdoo me zho.

⁷ Znu nagon naca: Zha Israel ne bzooblele me, zha cose guiaanwen lo me. Laa los demas zho, lel lozh gacndip zdoo zho, ⁸ zigne zhobneeque lo Xtiidz me, zaatne rnee: “Beenndip Dios zdoo zho, riennd zho zha gbig zho lo me; niicle ne zob lo zho, per rac zho zig rac zha ne rand; niicle zob diag zho, per rac zho zig rac zha ne peet rond. Ni scataque nac zho haxta lo nadze.” ⁹ Mincoque bzeet rey David, zeene rëb me:

Lëëque grë zhilni zho, lëëque grë ncuane row zho, gac zig len doo ne, len guiex ne tsietsobe zho; zeena ygaa zho guielnë ne rieguial zho.

¹⁰ Guiaan zho zig tib zha ne rold lo, guiaan zho zig tib zha ne blozh blengw zhits.

Psilaa Dios zha ne nacd zha Israel

¹¹ Grë zha Israel ne sca gocndip zdoo, guiabde to togo laa zho bnitlole ga. ;Lëda! Sinqe laa me bdeed diidz sca goc zho, zeena gbig grë zha stib guiedz lo me csilaa me zho lo xtol zho; ni tednëgaa zdoo zho gan zho laa me rcaania zha stib guiedz. ¹² Nana, telne scataa guielnzaac ne bgaa miech stib guiedz ne znu racndip zdoo zha Israel, ;pe lëlgue dzigo zeene laa zho gbiire guiaanwen lo Dios stib? ;Zha naczhe grëraa guielnzaac ne ygaa miech!

¹³ To ne nac to miech stib guiedz, led nanle to ganle, ible Dios bzo naa none naa Xtiidz me lo to. Scagaa naa, dib zdoo naa rioxco naa run naaw, ¹⁴ zeena togo soobladz palal

zha ladz naa ye zho squi gbig lo Dios csilaa me zho lo xtol zho. ¹⁵ ;Que talzhe ndzona zeene laa zho gbiire gbig lo Dios stib! Nli laa Dios psaan zho, laa grëgaa miech stib guiedz laa zho biaanwen lo me. Gacxe waa, ;tib guielbley nrooba zeene laa me ycaania zha Israel stib! Sac gon, rriequia grieaban zho ga.

¹⁶ Zigne pcaania Dios xmengol zha Israel bgab zho lo me, scaquegaa scaania me xpëed zho; sac gon, zig nac tib zhan yag, zeene ndaan low mine naaza len liu, ndaanaque zhicwa. Scaque nagon, zeene bzooblo Dios xmengol zha Israel, yele zho ga bzooblo me.

Nana, gzoob ne nac zha Israel zig tib zhan yag oliv: low nac xmengol zho, laa zho nac zhicwa. ¹⁷ Bdziñ dze brug palal zhicwa, dzigo ga bguiid zhicw yag oliv dan; lëë yag oliv dan co nac to ne nac to miech stib guiedz. Sca nac ne laa Dios pcaania to zigne pcaania me xmengol zha Israel; ye to laa to nogaa guielnzaac co. ¹⁸ Lëëraasi, guiabde to togo nonraa to lo zha ne nac zhicwa mine brug ga. Golguien ganle, por lo yag ndaan zhicwa.

¹⁹ Nana, nend guiab to: “Per rioguiäl now, gacxe waa no biaan xlugar zhicwa, mine brug ga.”

²⁰ ;Golgap cuidad gon! Nli lëë biche zho, laa to biaan xlugar zho, porne bnëd zho nalo zho Dios zigne bien to rnalo to me; per golguien gacniatsde to. ²¹ Golgan ganle, niicxe zha name zhicwpaa yag co nac zho ni ptiche me zho, ;pelel to dzigo!

²² Golwi ganle zha wentaa Dios, per scagaa rdziladzd me gats xtiidz me. Mincocxe waa gondzed me grë zha co, laa to gon wen goc me lo to. Lëëraasi none gon to mine rnabey me, sac gon telne gonde tow, scaque gandzed me to.

²³ Nana, zig nac zha Israel ga, telne gbiire gbig zho lo me, ible squiid me zho lo yag co stib. ;Golgan ganle men

nroob nac Dios! ²⁴ Niicxe to na, nac to zig yag oliv dan, pquia zdoo me to pquiid me to zhicw yag oliv wen co, ꞑpeleꞑ zha Israel dzigo yquiad zdoo me, gbiire yquiid me zho lo yag ne nacpaa zho!

Scaania Dios zha Israel ne bzozit lo me ga

²⁵ Bets, bzian, laa naa gni lo to ganꞑe zha nac miꞑe no guic Dios gunꞑ me. Niicle ne rienꞑ miecha niina, per racladz naa gacnaꞑ tow, zeena gacniatsde to ne squi bzooblo me to: Nli ndal zha Israel racndip zdoo zozit zho lo me niina, per zeene laa grë miech stib guiedz blozh wbig lo me, ²⁶ hor co grëse zho, laa zho gbiire gbig lo me stib ycaania me zho. Zigne bzeetle zha ne biadteed xtiidz me, zeene rëb zho:

Guiedz Sión, ga griee menꞑ ne cuee zha Israel lo xquieꞑntseeb zho.

²⁷ Dzigo laa Dios csilaa zho lo grëtaa xtoꞑ zho, zigne psanꞑe me diidz lo zho.

²⁸ Leꞑ dze rii rlëe zha Israel ron zho none gnalo zho Jesús, par laa zho lo doꞑ. Znu rac zho zeena gdeeda diidz gbig to lo Dios, nac to zha stib guiedz; sangue Dios rleynie me zho, sac scale rëb me lo grë pxozgol zho. ²⁹ Me bzooblo zho, dzigo ible scaania me zho; sac gonꞑ, led yed me ctsëe xtiidz. ³⁰⁻³¹ Glo to nac zha ne ib bind xtiidz Dios, laa niinagaa na zha Israel nëd gon xtiidz me. Per zigne rquia zdoo me to niina, scaquegaa zdziꞑ dze ne yquia zdoo me zho. ³² Grëse miech, zigtaa zha Israela, zigtagaa tow ne nac to miech stib guiedza, laa Dios bneedz diidz sca gocntseeb to lo me, zeena grieelo glu me ganꞑe ne lalga rquia zdoo me ne.

³³ ꞑGotsaa gwi ganꞑe zha menꞑ nroobtaa nac Dios! ꞑPa lotaa rac me, pa lotaa rienꞑ me! ꞑPa lotaa rioxco me miech! ꞑCho grieelo guieꞑ pe nac miꞑe no guic me gunꞑ me, pe nacgaa gunꞑ mew? ³⁴ Zigne zhobneeque lo Xtiidz me,

zaatne rnee: “¡Choot nand pe no guic Dios gun me! ¡Choot grielod guiab lo me, znu znu been! ³⁵ Wlaltaa choot gard pe gdeed lo Dios, par guiab ne laa Dios zëeb.” ³⁶ ¡Peet gon nzëëbd Dios lo miech! Sac grëtaa ncuaane no, me psana, me naaza, ni me rnabeya.

¡Mese nac men ndzon, tibaque gotsaa dziuunnon ne me! Sca rieguiala.

12

Golban zigne rdziladz Dios

¹ Bets, bzian, laa to gocnanle ganle pa lotaa nquialadz Dios to. Nana sca, dib nacse to golsan to ladznia me, gac to zig tib gon mbe, tib gon ne gley me ycaania me. Sca glu to ne nli rleynie to me.

² Ib tsienaldraa to grë ncuaane ndzinlid ne noyac lo guidzliu rii, grëse zhgab ne paat rquiind, golcueew guic to; zeena gban to zigne racladz me, ni guien to ganle zha wentaaw zeene zienal ne minc rnabey me.

³ Ne znu nac naa zha ne pquia zdoo Dios noyun naa dziin rii, nligaa laa naa rso diidz lo to, ndzinli golgac, ib glude to ncuaane ni nacde to, sinque golguien cho nac to, zha rnalo to Dios. ⁴⁻⁵ Golgan ganle zha niaa xcuerp ne: nzian lë niaaw, ni tib tiba nose zaatne rquiina; scaque nagon nac grë zha ne ngab lo Jesús, nzian nac ne, per tib tib ne nose zaatne rquiin ne, tsod zha ne yquiind. Grëse ne none gnalolsa ne grë zha ne nacgrë ne.

⁶ Tib tib ne bneedzse Dios guielbiini lo ne, par grielo dziuun ne dziin ne pso me ne dziuun ne lo me. Gacxe waa, zha ne pso me cteed xtiidz me, none gnee zhow zigne csiaab mew guic zho;

⁷ zha ne pso me gun ncuaane yquiin lo grëraa miech, none gun zhow.

Zha ne pso me cseed miech, none minc co gun zho;

⁸ zha ne pso me gdeedlban miech, none lban gdeed zho. Zha ne pso me ygad, none dib zdoo zho ygad zho; zha ne pso me so gnabey, none ndzinlise gnabey zho; zha ne pso me cchoobladz zdoo zha ne mban noded, none nley gac zho tsienee zho lo miech.

⁹ Dib zdoo to golleynie samiech to. Gandzede to grë ncuaañe ntseeb, niapse ncuaañe rquiin gołtsienal. ¹⁰ Ine niowse golleynie grë zha ne nacgrë to, gacnguizhde to, quitniede to zho.

¹¹ Nguieel golgac, gacmbechde to, dib zdoo to gołtsoxco golgun mine nac xtsiin Dios.

¹² Nley golgac lo guielmban rii, gołsoladz ganle zha nactaa grë ncuaañe no gneedz Dios lo to; gołxecw lo grë guielnë ne gan to; tibaque gołzodiidznie Dios.

¹³ Gołtsoxco xliaadz grë zha ne nacgrë to ngab to lo Dios; zaacse gołcuëzlo zha ne ziaadted lidz to.

¹⁴ Grë zha ne rtsidil to, laa ne gdzibdee to zho, gołnab gunlay Dios zho.

¹⁵ Zha ne no guielbley, golgacnie zho lo xquielbley zho; zha ne nogaa guielnë, golgacnie zho lo xquielnë zho.

¹⁶ Gacniatsde to. Grë zha ne rzac miech peet nond, gołtsieelsa zho; guiabde to to nac zha ne racraa. Niowse golbannie zha ne nacgrë to.

¹⁷ Zha ne csacsi to, gunde to ne yeque to csacsi zho. Gołtsoxco wen golgac lo grëse miech. ¹⁸ Tilniede to samiech to, gołtsoxco tibaque wen golbannie zho.

¹⁹ Golguien, zha ne csacsi to, ib guiabde to ne tozhal ctsire guielnë co, sinque gołsana ladznia Dios, metaa nan zha gun me xquielwxtis me; zigne ziaad lo Xtiidz me zeene rëb me: "Naa raguial gun guielwxtis, naa gunquizh miech tel pe nac dol ne zëëb zho. ²⁰ Gacxe waa, zha ne rlëë lo luu, zeene gan luu mban rac zho rcaabedz zho, mazd bdeed ncuaañe gow zho; gangaa luu mban rac zho rnab zhis zho,

bdeed ncuaa_{ne} guie zho. Sac zeene sca gu_n luu, stoladz zho csoladz zho mi_{ne} been_n zho luu; rrieequia gui ga cuib guic zho.” ²¹ Gol_guien_n sca, niapse guie_lwen gol_tsienal_n, zeena sca ycuëz to lo guie_lntseeb. Gdeete to diidz ne ye to gu_n guie_lntseeb.

13

Gol_gon mi_{ne} rnabey wxtis

¹ Grëse to none gon to xtiidz zha ne nacpaa wxtis. Sac grëse zha ne nac wxtis, ible Dios rdeed diidz ne laa zho rac dziin co. ² Gacxe waa, zha ne racndaan lo wxtis, rrieequia ye lo Dios ga racndaan zho; ni zha ne racndaan, lëëque zha rguib ted zho caxtigw ga. ³ Gol_gan_n gan_{le}, ible laa wxtis zo, par zha cobey caxtigw ne tsieguia_l zha ntseeb. Tel_{ne} racladzde to sca tsoxtseeb to lo wxtis, zaacse gol_gac; scagaa zha, tsod pe nacne ygaal_n zho to. ⁴ Dios psan_n rzo zho ni zha rteedlo to, ni scagaa, tel_{ne} pe guie_lntseeb ne gu_n to, zhaque gnabey pe caxtigw ne yga_n to; sac gon_n, ible laa Dios bzo zho gu_n zho guie_lwxtis. ⁵ Gacxe waa, ib none gon to mi_{ne} rnabey zho, zeena tsoxtseebde to lo zho, ni scagaa niicle nëz lo Diosa i_{ne} tiblise no guic to.

⁶ Scaque dimi ne no gdeed to lo zho, gol_gdeeda; sac rquiin dimi co parne grieelo gu_n zho tel_n pe nac dziin ne no gu_n zho. ⁷ Gol_guien_n sca, dimi ne no gdeed to lo zho, gol_gdeeda; mi_{ne} rnabey zho to gu_n to, gol_guna. Gol_leynie zho, quitniede to zho, gol_guien_n zha non nac zho.

Gol_leynie samiech to

⁸ Grë ncuaa_{ne} rieguia_l to gu_n to, gol_gungazha zeena bdedgaw; sangue samiech to, none tibaque gleynie to zho. Zha ne rleynie samiech, grële mi_{ne} zhobnee lo Xley Dios ga quiayun_n zho. ⁹ Sac tel_{ne} rleynie to samiech to zigne rleynie to to, nod pe nacne csacsi to zho; guiab to:

laa to yquidie zho,
 laa to gut zho,
 laa to cuan zho,
 laa to tsonie tsiel zho,
 gzoobladzгаа to grē ncuane quianie zho.
 Gacxe waa, zha ne rleynie samiech zigne rleynie zho zho,
 grēle mine zhonee lo Xley Dios ga quiayun zho. ¹⁰ Zha
 ne rleynie samiech, rsacsidraa zho zho; ni min co rnabey
 Dios. Gacxe waa, grēse ne none gleynie ne samiech ne.

¹¹ Ib none gban ne zigne racladz Dios, golle na tsa ne
 biini; sac gon, laa dze ne ycaania Dios ne bii ziaadgaxraa,
 lēdle zeene psilo rnalō ne me. ¹² Dziuun ne cuent laa
 guieel lozhle ted, laa biini ne guini liu dze ndzon co
 ziaadle; gacxe waa, ni lalnu guionald ne mine racladz
 mendox, sinque mine racladz Dios, min co golgotsaa
 dziuun ne. ¹³ None ndzinli gban ne:
 dziuun ne guielgonziu,
 dziuun ne grē lni yozh,
 yquiangobd ne zha ne led tsielēd ne,
 dziuun ne grē guielyozh ne racladz xcuerp ne,
 dilnied ne samiech,
 glēēnied ne zho zeene stib noded zho.

¹⁴ Golgotsaa gnab ne lo Jesús sca, zig zie dze lozh csanmbe
 me xquielrien ne, csanmbe me zdoo ne, gac ne zigne
 racladz me. Dziuundraa ne grē ncuane ndzinlid ne
 racladz xcuerp ne.

14

Gzeed zdoo to mine run zha ne nacgrē to

¹ Golcaania zha ne gard tsoguicpaa zha nac Xtiidz Dios.
 Telne no palal mine riladz to zhaa rzac zho, glisquide
 tow lo zho. ² Gzoob ne, no to rzac peet nacda gow to grē
 lose guielwagw, laa zha ne na gard tsoguicpaa Xtiidz Dios,

rzacгаа wena tel_{ne} scuaan guizhyese gow zho; ³ ga nagon, ni stib ni stib nod pe nacne glisqui dien _{cho} pe row, dien _{cho} pe rowdгаа; sac gon _{grëse} to, Dios bzooblo to ngab to lo me. ⁴ Nana zig nac zho, lo Dios ngab zho, led lode tow; ¿cho nac to dzigo tso to glisqui to dien _{pe} run _{zho}? Dios nac men _{ne} nan _{tel_{ne}} lëew o lëdgaaw ga quiayun _{zho}; men _{nroob} nac Dios, me gdeed guiel_{biini} lo zho guien _{zho} gban zho zigne racladz me.

⁵ Scaque, no zho ziena _{dien _{pa}} dzepaa none gleynie zho Dios, nogaa zho rnee zac tel _{pa} dzetaa gleynie zho me. Per peet nacd ga, zac tib tib zho gun_{se} zho min_e rzac zho rdziladz me. ⁶ Tel _{pa} dzetaa wena, totsaque run _{zhow} par gun_{non} zho me. Scaqueгаа guiel_{wagw}, wena zha ne gow grëlosew; niicle zha ne ncueegaa ncuaane _{gow}, wenaquew, totsaque run _{zhow} par glu zho ne rleynie zho me, ni rdeed zho quizh lo me.

⁷⁻⁸ Sca nagon _{naca}, per led min _{cod} dzieets ne dziuun _{ne} min_e gacladztaa ne. Grëse ne ne nac ne zha ne ngab lo Dios, laa ne mban par dziuun _{ne} min_e rnabey Jesús, ni zeene _{guetгаа} ne, lo me none gdzi_n ne. Gacxe waa, niicle niina ne zomban new, niicle zeene _{gutlegaa} new, ladznia me no ne. ⁹ Sac gon _{tel _{Jesús}} gut me ni brieegan me; gacxe waa, me rnabey ne grëse ne, zigtaa zha mbana zigtagaa zha guta.

¹⁰ Jesús rnabey ne tib tib ne. Gacxe waa, nonguiel_{da} glisqui to lo zha ne rund _{min_e} run _{to}; nonguiel_{da} por min _{cose} sac to zho zig zha ne peet nond, tso to gnedraa to lo zho. Ni stiba, gal _{dze} ne laa Dios gun _{guiel_{wxtis}}, grëse ne laa ne none gacredz lo me. ¹¹ Zigne raquietaque lo Xtiidz me, zaatne rnee me:
Naa nac Dios mban, gneli naa lo to gan_{le}:
grëse miech, ible squiitsgzhib zho lo naa,
cueero zho ne nli naa nac Dios.

¹² Sca nagon̄ gaca, tib tib ne ib laa ne no cueero lo me tel̄ zha wban ne.

Csānde to zdoo zha ne nacgr̄e to

¹³ Nana sca, zha ne sca rund̄ gr̄e min̄e run̄ to, ible glisquidraa tow lo zho. Gol̄guien̄, gunde to ncuane rgobey to yquiaaqui gun̄ctal zho xtol̄ zho, o csaangaa zho Xtiidz Dios. ¹⁴ Tel̄ naa, nan̄paa naa led dol̄da gow ne gr̄e lose guiel̄wagw; sac niicle Jesús̄a scaque nac xtiidz me. Sangue zha ne rzac dol̄a, mazd gowd zhow; sac tel̄ laa zho gowa, xtol̄ zho ga gun̄ctal zho. ¹⁵ Zig rne naa ga led dol̄da, per tel̄ne xtsiin̄paa row to tib ncuane rquiaqui rsan̄ to zdoo stib zho, ga rlu to ne rleyniede to zho. ¡Gol̄guien̄ sca, gowde to ncuane yquiaaqui sozit zho lo Dios! Sac gon̄, blactaa guiel̄n̄e ne bded Jesús̄ psilaa me zho.

¹⁶ Ib gunde to gr̄e ncuane yquiaaqui gneen̄e miech to, niicle ne nan̄paa to led dol̄da. ¹⁷ Zha ne ngab lo Dios, min̄e none tsienie guic zho nac ne ndzinli gban zho, til̄nied zho samiech zho, in̄e nley gac zho (min̄ co nac min̄e rdeed Espíritu Sant); led tsod zho dien̄ pe zac gow zho, pe zac guie zho, pegaa gacda. ¹⁸ Sca rdziladz Jesús̄, ni zha ne sca gban, zleynie Dios zho, niiclegaa gr̄e miecha zleynie zho zho.

¹⁹ Goltsoxco sca, gunde to ncuane codil̄ to gr̄e zha ne nacgr̄e to; zeena tipse gac to lozh tsoquic to zha racladz Dios gban to. ²⁰ Ib gunde to, ne por tib guiel̄wagw codil̄ to gr̄e zha ne ngable lo Dios. Zig rnele naa ga, gr̄elose guiel̄wagw mbew, peet nacda gow new; sinque min̄e nonguiel̄da, nacne gow ne min̄e nan̄paa ne yquiaaqui csān̄ ne zdoo stib zho. ²¹ Min̄cocxe waa, mazd gowde to pe scuaan̄ b̄eël, guiede to nziu, tel̄ne min̄ co yquiaaqui gun̄ctal to xtol̄ zho; ni tel̄ pe gr̄eraa ncuane nan̄ to tsod zdoo zho, gunde tow.

²² Niicle ncuaa_{ne} nan_{paa} to do_{lda} gu_n tow, niiclegaa n_{ez} lo Dios_a led do_{lda}; per maz_d gu_{nde} tow ze_{ene} zo zha ne rzac do_{la}. ¡Wen zie zha ne sca niicle nan_{paa} zho do_{ld} nac mi_{ne} gu_n zho, per ru_{nd} zhow, parne gu_{ntald} zho xto_l zho!

²³ Sangue zha ne racchop guic ri_{end} zho die_n pe zow zho tib guie_lwagw, ni lozh ga row zhow, ru_{ntal} zho xto_l zho ga; sac be_{end} zho mi_{ne} rzac zho rdziladz Dios. Gr_{ese} ncuaa_{ne} rzactaa zho wend ni gu_n zhow, xto_l zho ga gu_{ntal} zho.

15

*Gol*gacnie zha ne nacgr_e to

¹⁻² Gol_{guien} sca, to ne nac to zha ne dziitsle zo lo Xtiidz Dios, gol_{gacnie} gr_e zha ne gard sodziits lo Xtiidz me. Gol_{gun} ncuaa_{ne} tso zdoo zho, ncuaa_{ne} yquiin lo zho, ze_{ena} lozh guie_n zho zha gnalo zho Dios; led tso_{de} to gu_n to ncuaa_{ne} yquiinse lo to.

³ Gol_{gan} gan_{le}, niicle Jes_{usa} bguibd me niac ncuaa_{ne} nquiin lo me. Zigne raquietaque lo Xtiidz Dios, zaatne rnee: “Gr_{etaa} diidzn_e ne rnee zha ne rl_{ee} lo Dios, gr_{esew} pcon zho me.”

⁴ Gr_{ese} mi_{ne} raquiet lo Xtiidz Dios, padzeela pquiaw; ni ib laaw pquia ze_{ena} gacndio_n ne zha no gban ne. L_{ee}w rnee none nley gac ne, l_{ee}w rnee guieete ne yquiambiaaz ne yгаа ne gr_e mi_{ne} bzeetle Dios. ⁵ Dios me_n ne rneedz guie_lbley co, me_n ne racnie_n ne guieete ne, me gacnie_n to niowse gbannie to gr_e zha ne nacgr_e to. Gol_{leynie} zho zigne rleynie Jes_{us} to, ⁶ ze_{ena} gr_{ese} ne tipse gac ne dziool_{nie} ne Dios, P_{xoz} Jes_{us}, me_n ndzon ne rnabey ne.

Gr_{ese} miech noyon Xtiidz Ndzon Jes_{us}

⁷ Golguien sca, grëse zha ne nacgrë to, golcaania zho zigne pcaania Jesús to. Sca golgun, zeena xoobnenraa lë Dios.

⁸ Golsoladz ganle, zeene biaad Jesús nroob ncuaane been me lo zha Israel, me biaadgun grëtaa mine bzeetle Dios padzeela. Ga blu Jesús grëse mine rnee Dios, ib run mew. ⁹ Ni golsoladz ganle, ye grë miech stib guiedz biaadsilaa me, gane niina grëse zho roolnie Dios, ne scataa pqquia zdoo me zho. Min co raquiet lo Xtiidz me, zaatne rnee:

Zoolnie naa luu,

ni zlu naa lo grë zha stib guiedz ne men non nac luu.

¹⁰ Stib lugar rnee:

To ne nac to miech stib guiedz,

jine nley golgac grë to zha Israel!

¹¹ Ni no stib zaatne rnee:

Grëse to ne nac to miech stib guiedz,

jolleynie Dios! jGolsannziuu lë me!

¹² Mincoque ga bzeet Isá, zeene znu pquiaa me:

Zrieequia tib men lo xtii Isái;

men co gnabey lo grëse miech stib guiedz,

ni me gnalo zho grëse zho.

¹³ Mincoxe waa, to ne nac to miech stib guiedz, rnab naa lo Dios (men ne psanle diidz pe nac grë ncuaane yгаа ne ga) gneedz me guiebley lo to, gacnie me to peet zhgab ctsebde to niina ne laa to rliladzle me. Rnab naa lo me, gacnie Espíritu Sant to ine gley to yquiambëz to gac grë mine psanle me diidz ga.

¹⁴ Bets, bzian, nanle naa zha wen nac to, nacde to zha ne csañ zdoo stib zho; rienle to zha racladz Dios gban to, rienle to zha cso to diidz lo grë zha ne nacgrë to;

¹⁵ per lo guits rii gon nzian ncuaane rso naa diidz lo to. Guiabde to togo ndox naa lo to, sinque laaw ben naa zeena guiaanladzde tow. ¹⁶ Ne nquialadz Dios naa,

laa me bzooblo naa noyuu naa xtsiin Jesús, none naa Xtiidz Ndzon me lo grë miech stib guiedz, zeena csanmbe Espíritu Sant zho; lozh ga gded naa zho lo Dios zig tib gon ne gley me ycaania me.

¹⁷ Gacxe waa, tel niina rley naa sac noyacnien Jesús naa noyuu naa dziin ne pso Dios naa. ¹⁸ Me noyacnien naa none naa Xtiidz me lo grë zha stib guiedz, zeena gban zho zigne racladz me. Ni laa zho nobig lo me, sac ran zho grëse mine rne naa mban naaw zigne naca, ¹⁹ ni ran zho zha racnien Espíritu Sant naa run naa grë milagr, grë ncuaañe rzee zdoo zho. Sca nagon none naa Xtiidz Jesús lo zho, brie naa Jerusalén briequia naa haxta nëz xtan zha Ilir. Guiabde to togo rtix naa diidz. ²⁰ Ni laa naa noxco za naa zaatne waltaa gard gon zho cho nac Jesús, zeena gasëëbd naa zaatne ziyele zha ne güeynee Xtiidz me. ²¹ Laa naa zana zig zigne zhoobnee lo Xtiidz Dios, zaatne rnee: “Grë zha ne waltaa gard gon cho nac me, zeene gan zho grëtaa ncuaañe run me, laa zho gunbey me.”

Racladz Pabl tsie Pabl Roma

²² Nzian vuelt gocladz naa nialgan naa to, per ib bdeetew diidz, sac laa naa bia grë dan co biaseed naa miech. ²³ Izle ga na tibaque sca no guic naa, laa niina ne laa naa psiaal lo xtsin naa, nataa nagon ible zial naa. ²⁴ Laa naa no ga Spañ, dzigo lëë nëzle ga teed naa Roma i guialgan naa to. Tib guielbleya lo naa guialquiabdiuuzh naa to, dzigo lozh ga siguiel to gun to xyudar naa grielo ga naa nëz Spañ.

²⁵ Laa niina, laa naa no ga Jerusalén gasan naa tib gon lo grë zha bets, zha bzian ne no ga; ²⁶ sac grë zha bets, zha bzian, ne no nëz Macedon, ni nëz Acay, laa zho bnediidz beenlo zho palal dimi cxeel zho yquii grë zha prob ne no nëz co. ²⁷ Niapse zdoo zho gol ptop zho gon co, sac rzac zdoo zho grëtaa mine been zha Jerusalén lo zho; sac gon,

zha co güeynee Xtiidz Ndzon Jesús lo zho. Laa niina, laa zho rxeel palal ncuuañe rgaa lo zho yquiin zha Jerusalén.

²⁸ Zigne lozh nagon gasañ naa gon co Jerusalén, dzigo laa naa teed guialgañ naa to i zigne nile naa ga. ²⁹ Rien naa nroob guielnzaac ne gneedz Dios lo to zeene laa naa guial.

³⁰ Bets, bzian, golguien ganle Jesús rnabey ne grë ne; ni rleynie ne zha ne nacgrë ne, sac Espíritu Sant nacnie ne. Gane niina, laa naa rnab lo to, golgotsaa gnab ne lo Dios gacnieñ me naa; ³¹ goľnab lo me, csilaa me naa lадznia grë zha Israel ne gard guien cho nac Jesús. Goľnab lo me, ine gley grë zha bets ne, zha bzian ne, ycaania zho gon ne gasañ naa lo zho nu; ³² zeena ine nley no zdoo naa glanso naa lo to, ine gdziiladz naa len dze ne cuëz naa lo to i. Sca nagon no guic naa, totsaque gneedz Dios diidz gaca. ³³ Ni me ne nac me men ne rbee miech lo grëse zhgab, lo grëse guielxtseeb, me gacnieñ to. Sca gaca.

16

Bdiuzh

¹ Bets, bzian, len dze rii laa Feb, tib wnaa ne run xtsiin Dios guiedz Cencré, laa me guiaad nëz lo to i. ² Laa naa rso diidz lo to, zeene glanso me i niowse golcaania me, golcaania me zigne riegual ycaania ne zha ne ngab lo Dios. Golsiguiel goldeed grë ncuuañe yquiin me; sac gon, tel me ndal grë zha ne ziyacnie me lo xliaadz zho, haxta naa blactaa ziyacnie me naa.

³ Ni rnab naa lo to, golsiguiel goldeed zhibdiuzh naa lo grë zha qui.

Goldeed tib zhibdiuzh naa lo Aquil i, grop tsieel me Priscil. Blactaa ziyacnie zho naa zidziuun no xtsiin Jesús, ⁴ haxta bdedlaa zho niet zho psilaa zho naa lo guielgut. Rzadox zdoo naa mine been zho ga, niicle grëragaa zha zit ne nacgrë new, rzac zdoo zhow.

⁵ Ni scagaa, grë zha ne rcaalsa lidz zho riegoolnie Dios, goldeed zhibdiuzh naa lo zho. Goldeed zhibdiuzh naa lo Epenet, rley naa rsoladz naa me; lëe me nac zha Asia ne glopaa bzëeb xnëz Jesús.

⁶ Goldeed zhibdiuzh naa lo Marí, blactaa noyuj me xtsiin Jesús lo to.

⁷ Goldeed zhibdiuzh naa lo Andrónic, lo Junias, grop menladz naa zha ne no i; gzapaa no zho bdzio ladzguiib. Glo zho bliladz Jesús lo naa, zha nziuu nac zho lo grë zha ne pxeel Dios nonee Xtiidz me.

⁸ Goldeed zhibdiuzh naa lo Ampliat, lëe stib zha ne rdzieel xtidz naa ga; ⁹ lo Urban, rsoladz naa me, tipse bdziuu no xtsiin Jesús grop no; lo Staquis, stib zha ne nziuu lo naa, goldeed zhibdiuzh naa lo zho; ¹⁰ lo Apel, ye me blactaa ncuaane bded me blu me ganle ne nli dib zdoo me rnalo me Jesús; lo grë zha ne no lidz Ristob ne.

¹¹ Goldeed zhibdiuzh naa lo Herodion, ye me menladz naa nac me; lo grë zha ne no lidz Narcis, zha ne rliladzle Jesús; ¹² lo Trifen, lo Trifós, ni lo Pérsida, gza menj wnaa rii blactaa noyuj zho xtsiin Jesús.

¹³ Goldeed zhibdiuzh naa lo Ruf, zëeb xtiidz me lo grë zha ne nacgrë ne; goldeed zhibdiuzh naa lo xniaa me ne, runj naa cuent lëe stib xnia naa ga, blactaa pteedlo me naa.

¹⁴ Goldeed zhibdiuzh naa lo Asíntric, lo Flegon, lo Hermes, lo Patrob, lo Hermas ni lo grëragaa zha bets ne nacgrë zho.

¹⁵ Goldeed zhibdiuzh naa lo Filólogo, lo Jul, lo Nerew grop bzian me, lo Olimp ni lo grëraa zha bets ne nacgrë zho.

¹⁶ Grëse to bets, grëse to bzian, golcaania zhibdiuzh naa. Grëse zha ne rliladz Jesús nëz rii, laa zho rxeel bdiuzh lo to.

¹⁷ Nu ne laa naa csiaalle lo guits rii, laa naa rso diidz lo to, nsin golso lo grë zha ne ziaad loxaque dien zha codil

zho to, dien zha gun̄güet zho to, rlu zho miñe ni nacdraa Xtiidz Jesús; yquiaadiagde to zhiwseed zho.

¹⁸ Grë zha co, led xtsiindraa Jesús ga run̄ zho, sinque laa zho noxco ncuane gdeed guxt xcuerp zho. Diidz nex, diidz ndooladz rnee zho; grë miech ne beelze pe riladz, znuse rquidie zho zho. ¹⁹ Sangue to, zëëb diidz ne ib rsaande to miñe nac Xtiidz Dios, zianał to miñe rnabey me.

Rley naa ron naa squitaa nguzobdiidz to. Racladz naa tibaque squi niini gac to, zeena guien̄ to niapse ncuane yquii gun̄ to, ni lalnu tsode to lo guiełntseeb. ²⁰ Scagaa Dios men̄ ne rtiche grëse zhgab, grëse dzeb, merle quixdze me Satanás, zeena peet grieelodraa gun̄ ma. Jesús, men̄ ndzon ne rnabey ne, me gacniē to.

²¹ Golcaania zhibdiuzh Timoté, men̄ ne quianie naa xtsiin̄ Jesús, laa me rxeeł bdiuzh lo to; scaque zha ladz naa Lus, Jasón ni Sosípater, laa zho rxeeł bdiuzh lo to.

²² (Naa nac Ters, naa noquia guits rii, ye naa laa naa rxel̄ zhibdiuzh naa lo to i. Rleynie naa to, sac ye to ngab lo Jesús. ²³ Golcaania zhibdiuzh Gay, men̄ ne rbëz naa lidz, laa me rxeeł bdiuzh lo to. Lidz me nu rcaalsa grë zha ne riladz Jesús nëz rii. Ye Rast, men̄ ne nac wxtis quianap xtimi guiedz rii, ni bets ne Cuart, laa zho rxeeł bdiuzh lo to. ²⁴ Jesús men̄ ne rnabey ne, me gacniē to grëse to. Sca gaca.)

²⁵ Laa naa rsan̄ to ladznia Dios, me gacniē to lozh sodziits to lo Xtiidz me, miñe none naa lo miech. Haxta zeene gard tsaa guidzliu, znu no guic Dios csilaa me grë miech lo xtol̄ zho, per choot gocnanda, naraa laaw bzhoobnen̄. ²⁶ Laa niina, nzian zaatne nogaaz Xtiidz me, zeena grëse zho guien̄ Jesús none gnalo zho, ni miñe rnabey me miñ co no gun̄ zho. Grë zha ne biadteed xtiidz Dios padzeela, bzeetle zho ne znu gaca, ni ible Dios rnabey

ne znu gaca. ²⁷ ¡Mese nac Dios, mese nac men ne nlipaa rien! ¡Tibaque sca golgotsaa dziuunnon ne me, grëse ne ne nac ne zha ne ngab lo Jesús! Sca rieguiála.

Pabl

Diidz ne rdeed guielmban

New Testament in Zapotec, Mixtepec (MX:zpm:Zapotec, Mixtepec)
copyright © 1998 Wycliffe Bible Translators, Inc.

Language: Mixtepec Zapotec (Zapotec, Mixtepec)

Translation by: Wycliffe Bible Translators, Inc.

Zapoteco, Mixtepec [zpm], Mexico

Copyright Information

© 1998, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Mixtepec

© 1998, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 14 Jun 2022 from source files dated 9 Jun 2022

5317ca58-7555-5e4c-a420-e1e9210e2df2